

Kalaallit Nunanni aatsitassap piiarneqarsinnaatitaasup suulluunniit uran-imik akuata 0,1 % -mut qaffasinnerpaaffilerneqarnissaa piaarnerpaamik sulissutigeqqullugu Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Siumup Inatsisartuni ilaasortai)

Akissuteqaat

(Inuussutissarsiornermut Aatsitassanullu Naalakkersuisoq)

Aappassaanneerinnineq

Matumuuna Inatsisartut Inuussutissarsiornermut Ataatsimiititaliaanni ilaasortat siunnersuutip matuma siullermeerneqareernerata kingorna ataatsimiititaliami suliarinninnerannut qutsavigissavakka.

Siunnersuutip siullermeerneqarnerani siunnersuut itigartinneqassasoq Naalakkersuisut inassutigaa, pissutigalugu taamatut aalajangiinissamut piffissaanngikkallartoq isumaqaratta.

Piffissap ingerlanerani urani pillugu apeqqutip annertunerusumik paasinarsisinneqarnissaanut tunngatillugu ingerlatanik arlalinnik aamma innuttaasunik ataatsimiititsinernik Naalakkersuisut ingerlataqarput.

Greenland Minerals and Energy Kuannersuarni peqarfimmi, aatsitassat uranitaqartut ilanngullugit, VVM-imut aamma VSB-imut misissuinerneq suliaqarsinnaasoq akuersissuteqarput. Akuersissuteqarnermi tassani siunertaasoq tassaavoq, tunngaviusut pinerullugit politikikkut oqallinnerit ingerlaannarnissaannut taarsiullugu, uranisiorluni aatsitassarsiorfimmik ingerlatsinerneq sunniutaasussat pillugit ilisimasaneq aalajangersimasunik pissarsinissaq. Misissuinerit taakkua sulii naammassinngillat.

Urani pillugu atugaaraq GEUS-imit aamma DMU-imit aammalu immikkut ilisimasalinnit toqqartukkanit ilaatigut RISØ-meersunit suliarineqartoq saqqummersinneqarpoq. Atuagaaqqami pissutsit aatsitassarsiorluni misissuinerneq/piiaanerneq, isumannaallisaanermeq peqqinnissamullu il.il. tunngassuteqartut assigiinngitsut nassuiarneqarput.

Uran pillugu TV-ikkut aallakaatitassialiorneqarnissaa Naalakkersuisut isumagivaat, tassani aatsitassarsiornermik ingerlatsinerup inuiaqatigiinnut tunngasortai attuumassuteqartut aamma avatangiisinik sunniinerit, immikkut ilisimasalinnit arlaannaannulluunniit attuumassuteqanngitsunit paasinarsisinneqarlutik. Aallakaatitassiami kattuffiit innuttaasullu assigiinngitsut peqataaninneqarput, taakkualu uranimik piiaanissaq illersorlugu akerleralugulu oqaaseqarnissamut periarfissinneqarput.

Uran pillugu TV-ikkut oqallittoqartarpoq, tassani politikkerit, illersuisut akerliusullu urani qulequtsiullugu oqallittarsimallutik aammalu innuttaasut apeqquteqarnissamut periarfissinneqartarsimallutik.

Kiisalu politikkerit Inatsisartuneersut aamma Kujalleq kommunimeersut peqatigalugit Canadamut uranimut tunngatillugu paasisassarsiorlunga angalavunga. Siunertaasoq tassaavoq Canadami naalagaaffiup ilaanit uranimik piiaafeqartumit ilisimasanik misilittakkanillu pissarsinissaq.

Maannakkorpiaq Naalackersuisut Kalaallit Nunaanni aatsitassanik qinngornernik ulorianartunik akulinnik piianerup ingerlatsinermut tunngasortai pillugit nassuiaammik suliaqaleruttorput. Suliassaqarfimmi akuersaangilluinnarnissamik politikkeqarnerup maannakkut atuuttup atorunnaarsinneqarnissaa pillugu aalajangiisoqassagaluarpat, malittarisassanik erseqqinnerusunik pisariaqartunik suliaqarnermik nassuiaat malitseqartinneqassaaq.

Tassunga atatillugu iluaqutaangaatsiassaaq attuumassuteqarlunilu, akuutissat qinngornernik ulorianartunik akullit pillugit inatsisit aamma nunani tamalaani isumaqatigiissutit suut, ilanngullugit piianerup, assartuinnermut, suliarinninnermut, uninngatitsinermut, niuernerup, siaruarerinninnissamut il.il. maleruagassat, Danmarkimut atuunnersut aammalu maleruagassat suut Kalaallit Nunaannut atuunnersut paasiniaanissamut ikiuunnissaq pillugu Nunanut allanut ministereqarfiup aasap ingerlanerani danskit qitiusumik allaffeqarfiat qinnuigisimammagu.

Misissuinerit taakkua tamarmik 2013-ip ingerlanerani naammassissasut naatsorsuutigineqarpoq.

Inuussutissarsiornermut Ataatsimiititaliaq isumaqatigiittoq Siumup aalajangiiffigisassatut siunnersuutaanut allannguutissatut siunnersuummik saqqummiussivoq. Allannguutissatut siunnersuutip atuutilerani, immikkut ilisimasalinnik arlaannaannulluunniit attuumassuteqanngitsunik suligasuartussanik, UPA13-imi nalunaarusiamik akuersaangilluinnarnissamik politikkeqarnerup naleqqussarneqarnissaata kingunerisassaannik paasinarsitsisumik saqqummiisinnaasumik pilersitsinissamik Naalackersuisut peqquneqassapput.

Naalackersuisut isumaqarput, nalunaarusiaq taamaattoq misissuinerup ingerlanneqareersunut tapertaalluarsinnaasoq, taamaattumillu inassutigissallugu siunnersuut akuerineqassasoq.